

西事江略

一
八
冊
函

西事彙略卷七

迤西陸防各軍總司令部編輯

政務下

教育

省城學政司鑒號電悉榆城中學成立幾費經營今縱不能擴充乃欲加以歸併若學生俱照舊額恐省校必不能容若省城分設數校恐經費必不能減且吾滇地方寥闊在三迤中心點各設一中學各生已或畏跋涉之勞全併省城從學者少則千餘里多或式千餘里其不廢於半途者鮮矣學生廢必減額既減額必議裁屢減屢裁費固省而人材則終不可得建設前途尙堪問乎學務固非根源專責然此次之出既預聞地方政治則學務亦其一端蒙自所不敢知大理則必不可并頃已電請軍政部更正前案希仍照舊辦理免事紛更爲要如何乞覆根源簡印

省城軍政部鑒大理中學堂幾費經營始克成立源到榆後詳加攷察非惟不可議廢且當力圖擴充昨以由雲龍委署永昌府電請軍府以楊瓊接任校長奉復允准在案

繼復以學生人數過多無考定教科稽核功課之人教務必致採雜當予暫行添設教務長一員札委教員張肇興兼充電知學政司備案頃准該司復電稱大理蒙自中學師範各校明年均併歸省校辦理已詳奉貴部批准等語查雲南地方寥闊建設需材榆城中學辦理得宜甫議力籌欸項再予擴充今乃議均併省校在學生或憚跋涉之勞逡巡而止在省校必形擁擠之患管教爲難源既與聞民事學務亦民事之一實大以爲不可應請將前案更正飭將各中學照舊辦理庶於建設前途有裨愚慮所及希核辦示復根源叩箇印

省城軍政部鑒養電敬悉扶持小學探教育之原體恤地方省徵收之苦用意甚善無容贊詞惟第二中學欸項本由各府中學歸併因有不盡由地方籌解者且一切欸項何一不出於地方不必待籌解徵收而後屬於地方也中學所造仍各地方之人才不得謂養其才於小學即地方之事養其才於中學非地方之事不必中學之瘡遂爲小學肉也且今之歸併如併於第一中學其欸又何嘗不出於地方抑或另立宏規其欸

是否能不出於地方况由地方籌解與非地方籌解同爲本省之款歸併之後校中之經費仍視學生之人數爲增減盈虛之數殆無差異而道路遙遠膳費騰貴徒使邊遠學生望而却步耳中學生視其潰散則各地方小學皆將受其影響亦非所以爲小學計也第三中學交通便而費用等似難概論源忝任西事既有所見不敢不陳如苦徵收之難或予酌減二成亦可稍紓財力如何之處統祈裁擇示覆根源叩篠印

雲南軍政部鑒歌電敬悉當經轉電該核長等核議具覆去後茲復據前監督由守稱該校簡易師範一班已屆畢業因事中止擬請飭楊校長將師範未完功課趕即召齊授畢考試畢業以完舊案至新班完全師範自應遵電停止召集等語合並電達用備採擇施行根源叩敬印

省城學政司鑒方今改良教育所有審定教材考核功課事繁體大擬於模範第二中學校暫行添設教務長一員贊同校長規畫一切以新委教員張肇興兼任除給委外希查照備案根源皓印

爲通飭清解學欸事據大理府模範第二中學堂監督由雲龍呈稱本校辛亥年各屬及西雲書院應解學欸俱多積欠辦理竭蹶懇請查核轉飭清解計呈清摺一扣等情據此查摺開各屬及西雲書院欠欸共有柒千伍百餘兩未解堂中用費浩繁日形支絀實於學務前途大有妨礙除分別札飭清解外合行札催札到仰該 即便遵照查明摺開欠欸數目趕于明年正月三十日以前一律解齊勿得遲延致干咎戾切切特札計抄發清摺一扣右札

各府廳州縣西准此
雲書院董事

大理孫聯長覽頃據第二中學楊校長電稱中學現缺兵式體操一員懇請揀員委充擬卽由該聯隊中遴委品性端方之排長二名往兼充該校兵式體操教員每月每員津貼銀肆兩並希就近給委報查可也總司令部支印

省城軍政部羅總長李次長暨學政司鑒大理中學校長楊瓊本南中宿學未便以瑣務責之耆儒頃聞李君厚本已歸國李君春醴劉君祖蔭亦在省擬請於兩君中酌派一人接任校務俾楊君得資頤養而校務亦賴振興如何乞復根源叩巧印

大理楊校長鑒電悉頃得省電委李君厚本接任校務侯李君到榆再行交替我公宿學雅望源已電准軍府任爲迤西陸防總司令部參事至教務長一職本爲章制所無前以整飭之際暫行變通增派現在榆事就理應卽裁撤以符通章張君肇興卽專任國文教員李君文源因培初任校諸多不便所任教員暫行銷差另候委用並希轉達知照根源豔印

省城學政司轉李培初兄鑒來電悉榆校學生現已增至八班約有四百餘人歷史地理數學教員尙需人請酌聘二三員同來台駕仍希從速啓程爲禱根源叩有印

令迤西中學校前經力爭得免裁併茲復寬籌經費安立規模管教各員又極一時之選舉凡扶持整飭固已不遺餘力將來之成績良否翳惟各管教員是賴務望合力進行悉心整頓克有風聲之樹期符模範之名果該校於一年後成效昭著所有校中管教各員即當按其成績分別從優請獎以示旌異而勵進行除咨軍政部立案外合亟令知爲此令仰該校長卽便轉知管教各員一體遵照切切此令雲南模範第二中學

校校長李厚本

雲南官印局李潤泉兄鑒前飭秦善澤向貴局購石印機及鉛印活字本寄爲榆校之用現在該校需用甚急請與毓初妥爲籌畫速將所購器具配齊寄榆爲要值銀若干順示卽飭滙還根源叩佳印

爲札飭事照得大局既定建設需人必培養而後得人才非教育不能求實效查騰屬等小學學生現已畢業一班大理中學正在擴充亟應遴選錄送前往肄習合行札飭爲此札仰

府公所

查照舊案原送十七名之外再選送二十三名共足四十名之額一面

妥籌的欸以重學費此項選送學生應先儘此次畢業各生遣送其餘各學堂中及民間私塾子弟如有程度質地相當者仍可由府按格考選以廣造就并將籌欸辦法剋日議覆俾得早日資送無誤學期是爲至要右札騰衝府黃謙自治公所

大理中學堂楊校長鑒查騰越前送榆郡中學舊班學生十七名已改送日本三名僅餘十四名茲又添送新班學生伍名明詒董殿臣董殿魁羅朝湘李仲德陳定高余維

蕃趙德進闕金元尹培源許仁浩許仁傑李鑫泰張浴孫大光李崇新孫大槐莫自海趙德芳寸尊倫寸家興許奠國寸時久寸樹聲二十四名共計三十八名已飭府備文申送二三日內即可首途特此先聞總司令部刪印

令照得第二模範中學堂學生向由各屬申送來榆肄業每名解費銀五十兩并由學生添補膳費十二元前經照辦在案本年推廣學生二分之一如前送十名者添送新生五名共准送十五名餘則類推雖云加增名額并不格外收費僅照舊生若干名每名飭繳費銀五十兩其學生添繳之膳費銀十二元亦全行豁免以新舊班學生平均計算每名僅合繳銀叁拾叁兩叁錢現該校學生將已足四百名編爲八班所有改修講堂宿舍購置書籍紙張器物臨時各費在在需款雖極力節減而預算全年薪修經常費實需銀壹萬兩火食費實需銀八千兩此外如改修講堂宿舍購置書籍紙張器物體操衣各臨時費約需銀五千餘兩年共需銀二萬三千餘兩本年入款官費自費生應繳費銀合計一萬三千餘兩西雲書院舊款合銀二千八百兩現由省撥助銀一

千四百四十兩共入銀一萬七千二百四十兩下不敷銀約六千兩現在民力既艱公帑尤絀此項不敷之款本師長雖竭蹶萬狀必當勉力籌維決不忍再以涓滴責之於各官紳學生惟是各屬既增送學生而學膳各費反較上年減少已屬體恤周至在各屬官紳亦應力任其難仰體當局者之籌畫非易早將學費依限解繳以維要政而開學日久不特不將本年上學期應繳之費照解即去歲欠繳之數亦任意虛懸殊屬不成事體合行嚴飭爲此次令仰該府廳州縣自治公所遵照限文到五日迅將本年上學期應繳一半學費并舊欠若干依限解交該校以濟急需又舊章於各生應製操衣及所頒講義均須自行繳費現在操衣一項已由公家製備不再取資惟改良教育圖書課本增訂者多應收講義費酌加爲每生年繳銀三兩仍由各屬按名併同每期學費彙繳其下學期之費限至六月三十日解清勿論如何爲難應由該府廳州縣官紳先行挪墊一面自行籌款彌補如再任意拖延官則罰薪撤任紳則從嚴罰金決不寬貸其能將各期學費先期解繳者即記大功一次以示獎勵再各屬選送名額均經分

別規定以後各屬官紳務須照額還送如所送學生不及定額此項學費仍應按名解足缺額聽其續補以杜怠玩因循之弊至該屬如有自費願來堂肄業者每名飭繳學膳費銀三十三兩三錢講義費三兩共銀三十六兩三錢須將全年學費先行備齊始能由該處地方官備文申送來堂收學以免蒂欠切切此令迤西各屬府廳州縣各府廳州縣自治公所

令查榆城中學經費純恃各屬解繳之款以資應用該府申送學生至五十名之多應解膳學各費至一千八百餘金較諸各屬不啻倍蓰且能於本年應解之款先期如數繳解尤爲各屬所未有似此熱心學務深堪嘉許自應照前通令記大功壹次以示獎勵除咨軍政部飭學政司立案外合行令知爲此仰該府即便知照此令騰衝府知府黃謙

一件據雲州紳士呈強奪公款借公害公等情一案由

批呈悉凡地方公款無論官管紳管皆不得從中侵蝕任意把持查此項田租從前原

係蔣炳堂送作大理西雲書院經費嗣由書院撥還以作順雲緬三屬卷金旋又以之
修建三屬考棚復將此款開辦府屬初級師範學堂及師範停辦乃提作備解大理模
範中學學費是此款本係順雲三屬公共之款迭經歷任府歸作公用十餘年來並無
異辭茲該紳等藉口反正遂將此項據爲已有抗欠不交豈以反正後即將前案全行
取銷可任由該紳等盤踞把持耶如謂甲鄉之款不能移作乙鄉之用此指各屬自治
經費而言何得妄爲比擬若云此地距雲近而距順遠坐落在雲者雲即可霸收假如
太和之附糧在賓川趙州豈賓趙兩屬亦即可估霸不繳耶至於雲屬辦公經費措款
維艱斯惟賴地方官紳妥議熟籌秉公協助萬不得以三屬公共之款供一屬揮霍之
資况經營者之短報穀價挪後移前種種弊端藉公肥己斷爲公論所不許法律所不
容也以後此項田租永遠仍歸順甯府經營收作常年解大理中學校學費該府所送
學生皆順雲緬三屬之人所解之費卽順雲緬三屬之款無論何屬不得再有爭執借
事挪移每年秋收後由府行知雲州酌定穀價舉紳包收除去納糧若干全數繳府備

解其售穀價值應以年歲豐歉市價高低爲衡所折獲之租銀除中學校款外有餘仍留作闔府辦公之用不足由三屬按名均攤籌補以昭允協上年該紳等已收之租穀應由府飭州查覆賣穀時曾否稟明該州調查現在穀價每石估計得銀若干勒令該紳等卽日如數繳出解府以歸本年上學期之墊款併批解下學期之款斷不准狡賴違延致中校之款無着如該紳等有意把持假公濟私卽按名從嚴押追稟候懲辦以爲藉詞強收公款者戒希順甯府轉飭雲州官紳等遵照暨令知順緬兩屬官紳一體凜遵切切詞抄發

省城軍政部財政司學政司鑒前以榆城中學校款急需飭由大理府秦守撥銀貳千元應用原以由省領回補助該校之貳千元歸欸茲將該校學欸通盤合計尙不敷陸千餘兩竭力籌維尙未就緒此項補助之貳千元現由李校長厚本帶榆源已令其仍留作該校之用其大理府前撥之欸擬均作爲學政司之補助金毋庸歸還該府准其報司於府稅項下撥解卽由學司咨會財司知照立案仍由榆校具報司學校銷此實

因榆校日見發達籌款萬分艱難不得不極力設法免致退步且查第一中校學司諸凡籌備需費甚多榆校現有四百餘學生約計每人所沾漑者不過數元似可照准以後通常仍守以前貳千元之數此次提撥之款下不爲例可也並乞分電飭遵示復根源叩儉印

省城軍都督府鈞鑒趙州產石礪爲騰關出口大宗從前石礪公司未領三聯單以前每年出礪六千駄由州署每駄征稅銀三錢三分年約得銀貳千上下除額解百貳拾金外均歸官吏家丁中飽現大理中學堂亟待維持經費不敷擬卽提此項中飽之費作爲學堂之費飭由下關商會釐局按駄征收除額解外儘數解繳中學堂開支造報該公司前在榆具呈當經批飭將此次領單之礪運竣仍照完內地釐稅該公司業已遵從曾錄批具文呈報如此辦理於釐稅不致虧損於學務更大有裨益至前西道議請加課大理府議請加捐均未實行以後既照完釐稅應予一律豁免除另文呈請立案并分飭遵照外合先電稟乞賜查核巡按使藩師長根源謹叩歌印

咨案據財政司呈案奉軍政部批本司呈趙州石磧課稅照舊征收一案奉批呈悉趙州石磧稅既經涓滴歸公卽未便沿中飽舊說逕由省外提取致紊財政統一章程大理中學堂不敷經費應由該學管理員列欸報明酌辦等因一案後開奉批前因除呈覆分別咨行外理合具文呈報師長查考等情據此案查本師長前以大理模範中學校常經年費尙不敷銀八千金左右若該校以經費不足不能支持勢必因之解散殊爲可惜故反復籌維首由趙州石磧公司出口稅額解贏餘項下年約籌得銀壹千上下繼以下關釐金歸之商辦大加整頓由比較贏餘項下年約籌得銀二千兩左右又松桂會之騾馬場向未抽收釐稅議定從本年起前往征收此項騾馬捐以後永以爲例年約籌得銀叁肆千兩合計三項年約共籌得銀七千餘兩此三項者或係吏胥每年中飽之數或係國家漏未稽征之欸一經設法整頓立成鉅注以之補助該校常年不敷之數雖稍不足究易圖維既不剝削庫儲復不苛擾地方集各屬紳民商權僉云周妥業經先後電准軍都督府飭部立案並分別令飭所司切實辦理在案茲准前因

以趙州石礦稅既經涓滴歸公卽未便沿中飽舊說逕由省外提取致紊財政統一章程查國家建設學校正款尙自不惜何況提取中飽且經電准軍府不得謂爲紊亂財政統一章程所有原議提取石礦中飽以助學費仍請體念榆校經費困難准予照辦相應咨請貴部查核飭令財政司知照立案並希見覆施行此咨軍政部

本總司令於本年五月二十五日電陳軍都督府文曰迺西中學校本年學生較前推廣二分之一前送十名者則添送五名餘類推惟加增名額不加收學費各屬攤解學款仍照原定數目解繳舊章學生每名合繳費銀伍拾兩今合新舊班生平均計算連講義費每名僅合繳銀叁拾陸兩叁錢其由學生添繳之膳費十二元並予免繳以紓地方之力而啓向學之心現在該校學生已將足四百名編爲八班預算全年經常費實需銀壹萬兩火食費實需銀八千兩此外如改修堂舍購置書籍紙張器具操衣各臨時費在在需欸極力節減尙需銀陸千餘兩年共需銀貳萬肆千餘兩本年入款官費自費生應繳費壹萬叁千餘兩西雲書院舊欸銀貳千捌百兩現由省撥助銀壹千

四百四拾兩共計入銀壹萬柒千貳百四拾兩出入共不敷銀約六千餘兩當茲民力既艱公帑尤絀此項不敷之欸又不能不設法籌措以維教育茲查下關釐金舊章以八千兩爲比較前釐員黃河源僅解六千零卽黃乾濟加成報解亦未能達定額源前抵榆電請改委商董嚴鎮圭辦理該委自盡義務不支薪水到差後認真整頓從前隱匿之欸一概剔出歸公收入驟增於前詢據聲稱除比較外年約長餘一二千兩之譜嗣後擬請每年仍照八千比較照章除開支外悉數解司餘欸概行撥歸榆校以資補助仍由該校列欸造冊報司查考該校得此補助不敷之數已彌六分之一二其餘不足再爲籌維惟該校經費既賴贏數以維持此項贏數又賴抽收之起色抽收起色惟在釐委得人下關釐務之振興雖由嚴委之整頓亦以身爲商董故能不支薪水聯絡商情設另行委員不惟商情不洽開消亦將培增此項贏餘即不可恃擬請飭司明白規定將來下關釐金專由商會承辦委員不支薪水局卡僅准開支庶開消可以減輕收數不至削色榆校得贏餘之挹注亦賴以維持勿敝源爲扶持教育起見是否有當

乞交部核議示復根源叩等因譯發去後茲接財政司江電稱昨奉軍府發有電已議定遵照原擬歸併商會除加釐菸酒稅外以捌千兩爲額盈餘撥助榆校呈請咨復在案用特陳明財政司叩等由准此查下關釐金收數向旺自該委接辦以來益見起色現經電奉軍府發司核議仍照舊章每年除加釐菸酒稅外定額捌千兩贏餘概行撥歸中學校應即自陽歷六月初一日起將該局解司正欸查照定額除去開支按月照數解繳財政司以完釐欸此外盈餘之數雖難預行確定惟據稱每年約有一二千兩應即暫以此數爲衡按月儘數解交大理模範中學校作爲該校常年經費仍造具清冊呈報財政司查攷該委員等須知前委接辦責成整頓原期收數日旺並剔出隱蝕悉數歸公固不能以舊日比較爲限此次因須補助學校經費特將解欸改照舊章定額其定額之外名雖盈餘仍屬正欸不過於收數內劃出一部分以作學校經費不得因釐額已完遂可自卸責任現爲擴充收數維持學欸起見特將下關釐金由司規定歸商會承辦委員不支薪水僅准開支尤期在接洽商情節省開支俾收欸日以加增